

1 **Tut emblidau! O ti cucu!**

2 *L'odissea d'in parisol tgietschen ch'ei ius a piarder ella Viafier retica*

3 Jeu sun in parisol tgietschen. Mia ex-patruna ha emblidau mei ella  
4 Viafier retica. Ussa spetgel jeu a Wollishofen el  
5 «Fundsachenverkauf» enzatgi che cumpra mei. Jeu cuostel otg  
6 francs.

7 Capitau eis ei ina damaun da macort'aura avon dus meins: Mia  
8 patruna va schiglioc adina senza mei a luvrar. Mo quella damaun plova ei. Ella pren mei ord  
9 scaffa e banduna la habitaziun. Ei plova ed jeu sun cuntents ch'jeu astgel puspei inagada  
10 esser ell'aria frestga. Ils daguots da plievgia ruschnan sur mia teila impermeabla e fan  
11 sguezias. Quei hai jeu bugen. Mia patruna arriva alla staziun da Trun, in vitg en Surselva, ed  
12 entaupa in'enconuschenta. Ellas prendan il tren e patarlan d'incuntin. A Cuera fa ei bialaura,  
13 cura che mia patruna banduna il tren cun sia amitga. Ella lai mei semplamain anavos.



Funtauna: Freepik.com

14 **Centrala per cats a Berna**

15 Bandunaus e tementaus passentel jeu in entir di el tren. La sera catta mei il schubergiader e  
16 porta mei en in magasin, nua ch'ei ha aunc autras caussas isadas. Nus spitgein entochen  
17 ch'ins spedescha nus a Berna el post central che rimna ils objects ch'ins ha emblidau els  
18 trens svizzers. Las possessuras ed ils possessurs dils objects san s'annunziar via internet  
19 tier quei post e s'informar, sch'ins ha anflau nus. Tgi sa sche mia patruna scriva era in e-mail  
20 e vulesch saver novas da mei? E varga in meins, mo ella s'annunzia buc. Jau sun trumpaus.  
21 Tgi sa sch'ella ha gia in auter parisol? In verd, in blau, ni forsa schizun in mellen? Tgei  
22 capeta uss cun mei?  
23 Las davosas jamnas hai jeu passentau sper ina valischa da curom. Nus havein fatg empau  
24 amicezia, pertgei che nus essan arrivai il medem di el center a Berna. Uss vegnin nus  
25 denton separai. Jeu valel pli pauc che 50 francs e stoi perquei bandunar gia suenter in meins  
26 il post a Berna. La valischa vala dapli che 50 francs e sa restar treis meins.

27 **Ina paletta per di – e dapli**

28 Ensemen cun giaccas da plievgia, festa da viandar, sacs da durmir e valischas vegn jeu  
29 mantunaus sin ina paletta. Tuppamein vegn jeu gest stigmaus sper ina tastga da sport che  
30 toffa. Mo jeu hai era in tec cletg ch'jeu sun sisum. Sch'jeu fuss giudem ella paletta – curclada  
31 da varga in meter material – mass jeu forsa empaglia.  
32 In camiun transportescha la paletta a Wollishofen sper Turitg el «Fundsachenverkauf». «Eis  
33 ei pusseivel che la gliעד emblida tontas caussas?», sesmarvegla ina dallas duas luvreras  
34 che s'occupeschan dalla paletta. «Clar. Auters dis survegnin nus schizun duas ni treis  
35 palettas – tuttas plein rauba emblidada», di la secunda dunna. Ella para d'esser la scheffa,  
36 pertgei ella explichescha co zavrar las caussas.

37 Igl emprend prendan las dunnas a mauns la tastga da sport sper mei. Ellas svidan il cuntegn  
38 e bettan ils calzers da ballapei che toffan el rumien. Las caultschas cuortas e las soccas  
39 vegnan en in sac da resti. Il tricot original da Bayern-München mettan ellas d'ina vart per la  
40 vendita egl internet. La tastga da sport vegn sin la pluna cun uorden ch'ins vul vender ella  
41 stizun «Fundsachenverkauf». Era jeu sun in dils objects che setschentan sin quella pluna.

#### 42 **In niev vestgiu da nozzas**

43 Paucas uras pli tard port'ins mei gia ella stizun. Ella ei in toc pli gronda ch'il Volg d'ina  
44 vischnaunca dil Grischun. Ei ha vestgadira, velos e vitrinas plein bratschalets, uras, anials e  
45 telefonins. Jau vesess bugen dapli, mo ins depona mei visavi la cassa sper ils auters  
46 parisols. Jeu sun para buc il sulet parisol sin quest mund ch'ei ius a piarder.

47 «Con cuostas ti?», damonda il parisol sper mei. «Jeu cuostel otg francs», ditgel jeu, pertgei  
48 anson hai jeu udiu, co las luvreras han discurriu da miu prezi. «Allura restas ti buca ditg en  
49 stizun», remarca miu vischin, «ti has ina biala color e vesas ora sco novs. Jeu cuostel 14  
50 francs e sun tut ners. Jeu sun cheu gia dapi in onn.»

51 Miu vischin ei in paterlunz. Igl emprend selamenta el liung e lad ch'el hagi gia daditg buca pli  
52 sentiu plievgia sin sia teila. Allora entscheiva el a raquintar, tgei ch'el ha observau ils davos  
53 meins. «Sco parisol han ins gie ina prima vesta sin la cassa. Ti creis buc, tgei caussas ch'ins  
54 sa cumprar en questa stizun. Novs vestgius da nozzas! Cornas-tscharva! Ed inagada ha  
55 enzatgi perfin cumprau in set da flautas d'in fakir dall'India! Ellas vitrinas vi leu ha ei per cass  
56 bischutaria che vala passa 10 000 francs.»

#### 57 **Speranza plova ei aunc ditg**

58 Jeu selegrel gia d'era saver observar, tgei che la clientella cumpra el «Fundsachenverkauf».  
59 Cheu eis ei bia pli interessant ch'ella scaffa stgira a Trun. Mo miu temps en questa stizun  
60 cuoza mo paucas minutas. Ina dunna tschappa gia mei: «Tgei bi parisol tgietschen! Mo per  
61 otg francs! Quel emblidel jeu segir mai enzanua!» La dunna marscha cun mei alla cassa e  
62 paga. Ora el liber plova ei. Ils daguots fan sguozias sin mia teila. Speranza plova ei aunc ditg  
63 – buca che mia nova patruna emblidi mei era aunc enzanua.

*(Fontauna: La Quotidiana 12-08-2011, p. 2)*